



*Spiritus sanctus est persona distincta,
Patri Filioque coessentialis, & ab
utroque procedens.*

Sit quale numen quis capiat, nisi
Qui lucis ipse est incola propria;
Quis eloquatur, præter unum
Indigenam venerandæ abyssi?
Hinc, hinc pusillam mens aciem procul
Humana flectat; nil crepet hic suum
Vox nuper infans; quadrat auri
Sobria credulitas recenti.
Unus seipso est teste Deus, suæ
Ast unitatis tres socios habet;
Mirandus hos nodus cōarctat,
Limes & hos dirimit stupendus;
Haud ille tantum nomine dissonat
Trino, nec uno nomine consonat
Coetus; sed ipsum abjungit ipsa
Res, ligat ipsaque res eundem;
Non distrahit partitio scilicet,
Confusio nec textilis implicat;
Sed perstat idem quisque, & æquus
Cum paritate tenetur ordo.
Originali luce pater micat;
Pulchram emicando gignit imaginem,
Perfectiones quæ parentis
Omnigenas referens adæquat;
Par gloriosum se sibi protinus
Arctissimis complexibus ingerit;
Rex indè Cœlorum alter idem
Sanctus Amor placidè resultat:
Æterna sic exuberat & simul
Primo seipsam essentia continet
In fonte; se confert duobus,
Nec minùs hic sibi se reservat:
Ceu cum supremi participem throni
Natum benignus constituit parens,
Junctique mox natus parénsque
Munus idem attribuunt nepoti.
Tribus potestas sufficit unica,
Simplèxque cunctis gloria competit;
Cernunt eadem mente cuncta,
Cuncta manu peragunt eadem.
Insignit omnes fallere nescia
Summè colendo pagina nomine,
Quod nil creatum adsumat absque
Sacrilegi vitio furoris;
Tantoque dignas res titulo simul
Adscribit, ortis viribus absonas,
Queis fretus Orbis rector arcis
Occupat æthereæ cacumen:
Durando prima excedere secula;
Præsentia complere quod uspiam est
Loci; futurum est quicquid altâ
E speculâ procul intueri;
Rerum stupendam de nihili finu
Excire molem; & (quod magis arduum)
Ejus gravi attritam ruinâ
Præcipuam reparare partem;
Grandem tueri lumine provido,
Nutique forti vertere machinam;
Natura quas observat omnes
Pro libitu variare leges.

Sic attributis singula maximis
Persona fulget; non superat illi
Virtute juxta quisque pollet;
Gloriaque una coronat omnes.
Hinc cum salutis janua panditur,
Ac alma justo scedere gratia
Sancitur, immundisque verè
Nos benedicta repurgat unda;
Par jure cultus redditur omnibus;
Par, quippe summus; nititur integra
Spes singulis; sanctè dicatur
Oblequium Tribus æquum, & Uni.
Hæc ore certo ipsissima veritas
De se retextit; Spiritus hæc fide
Dignissimus nos de superna
Edocuit cathedra Magister.

*Episcopo Romano nulla in Ecclesiam
Anglicanam jurisdictio competit.*

TRans mare quid dubiis ita nos cōmittere ventis;
Quæ rigidas Alpes scandere causa jubet?
Scilicet Ausoniis leges arcessimus oris:
Usque adeò stolidis merx peregrina placet.
At potiora domi, quàm quæ venalia Romæ,
Et facillè & gratis sumere jura licet.
Prostat Cœli lex, æternis illita chartis;
Doctoremque ultrò se dedit ipse Deus;
An defunt oculi nobis, an corda? quid ergò
Scitamur Latii sensa maligna fori?
Cimmerias quorsum latebras invisere, nostros
Cum lux irradiet desuper orta lares?
Præclaro Musæ passim fulgore coruscant,
Et Papæ injussu quod sapiamus adest.
Hic quoque sanctorum constat successio Vatum;
In nostro multus præsidet Orbe Petrus;
Heu miser ille Petrus, cathedrâ si affigitur uni,
Et solo vetuli cogitur ore loqui.
Insula Romanæ nihil est cur Anglica cedat;
Non minùs hæc sanctum pascere docta gregem;
Non minùs in sacris justum sancire decorem,
Causas ancipites vel rescare valens.
Quin puro verum sincerius edocet ore,
Nosque magis justa cum ditione regit.
Est nobis quoque nata fidem virtute tueri,
Haud fictâ radians luce, corona triplex;
Quæ sapit, & cœli delatos munere nolet
Fucatâ titulos ambitione premi;
Nec, quicquid bruti jaculetur Roma fragoris,
Nos finet immani subdere colla jugo.
Arte suâ facilis ludat præcordia Galli,
Hispanumque gravem cogat iniqua pati;
Nativi juris vindex prudentior Anglus
Haud Italis prædam se dabit, atque jocum.
Invigiles propriæ sodes Romane salutis,
Te nostræ frustra sollicitudo tenet;
Et quæstus urget non satianda fames:
Jus dare vis, nummos ut possis demere; si non
Desipimus, lis hoc cardine fixa jacet.